

I. N. J. C.

DISSERTATIO GRADUALIS,
CAUSSAM INDIGEN-
TIÆ PUBLICÆ
IN
NON-NOTABILI PECUNIA-
RUM DEFECTU,
EXPLICANS,

QUAM

*Consens. Ampliſ. SENATUS Philos. in Reg.
Acad. Aboënsi,*
PRÆSIDE

MAG. JOHANNE
BILMARK,
HISTOR. AC PHIL. PRACT. PROFESSORE ORDIN.


Publico examini subjicit
FRIDERICUS LEBELL,
OSTROBOTNIENSIS.

In AUDITORIO MAJORI Die XVII Maji
Anni MDCCCLXXI.

H. A. M. C.

ABOÆ

Impressit JOHANNES CHRISTOPHORUS FRENCKELL.



PRÆFATIO.

Quantam firmitatem & agilitatem corpori animali, singulisque ejusdem partibus præstant nervi, quam maximam esse quotidie experimur; tantum quoque ad robur Imperii & commoditatem singulorum ci-vium conferunt pecuniæ, quæ proinde nervi rerum gerendarum haud immerito audiunt. Scilicet homines in duplice admodum statu, belli vel pacis, sunt constituti. In illo autem sicut vi summa omnia geruntur, ita eandem non parum intendunt pecuniæ; quibus deficien-tibus, omnia langvent torpentque, multæ expeditiones be-ne cœptæ intermittuntur vel penitus omittuntur, exer-citus facile ad incitas rediguntur, vel mandata Ducum contemnentes, sponte sua diabuntur, vel denique tu-multuantes in ipsos imperantes mucrones stringere non dubitant: magis enim regit quam regitur miles, si stipendia desint, quæ nexus & stimuli sunt, quibus ad gravissima quævis obeunda accenduntur cohortes. Quare etiam T. FLAMINIUS PHILOPÆMENI Achæorum Præ-tori, multis equitibus & gravis armaturæ viris instructo, sed p. cuniæ inopi dixit: manus eum & crura habere, sed ventre carere. Pacem omnes quidem poscimus, sed si civitas opibus fuerit exhausta, nec suam fortem meliorem reddere queat, conditionem hanc bellica vivendi ratio-

ratione si non deteriorem, saltem nec multo meliorem existimamus; miseria enim & squalore consumuntur mortales, quamvis dulcia felicitatis somnia ipsi sibi fingant; sicut Marte saeviente, molestis & continuis laboribus vires & membra sensim atteruntur. In curia, in foro, in rostris atque opificiis nullus omnino vigor, sed silentium regnat plus quam Amyclaeum. Redeat autem Plutus, olivasque aureo liquore large irriget, redibunt simul, excussis macie & pristina civium sequitie, vigor & alacritas, & aurea pax alma facie ubique ridebit, donaque sua, quibus tranquillitas ac felicitas nostra continetur, non parca dispensabit manu. Enimvero ea est rerum nostrarum conditio, ut commoda variis intermixta esse soleant incommodis, atque duo dentur extrema, quorum alterutrum si attingat utile, etiam quod maximum putatur, beneficam suam indolem amittat, & noxiu[m] evadat. Quemadmodum igitur corpus tenui nimis ac paucu[m] alimento tabe conficitur, nec non frequentibus nimis atque unctis dapibus obesitatem contrahit, quarum utraque ineptum admodum redditur muneribus suis rite obeundis: ita & pecuniarum defectus enervat Rempublicam, nec non nimia opum adfluentia ac rerum omnium satietas parit pigritiam, quæ industriam atque artes obtundit, facitque, ut cives, instar Tantalorum in divitiis divitias frustra querere cogantur (*a*). Licet igitur Monarchia Hispanica amplissimis totius fere Americæ opibus diu circumfluxerit; vix tamen lætior est ejusdem facies, quam ante aliquot abhinc saecula fuit; nam agriculturam, ceterasque artes, tanquam sordidas & a sua dignitate alienas adspernatûr Hispanica arrogans, & scientiæ, quæ per reliquam ferme Europam pleno fulgent lumine, e dubiis Scholasticorum crepusculis in occidua hac orbis parte vix emergere potuerunt; adeo ut ipsa opulentia heic pariat inopiam atque squa-

lorem. Argute igitur Illustris MONTESQUIEU (b) L' Espagne a fait comme ce Roi insensé, qui demanda que tout ce qu'il toucheroit se convertît en or, et qui fut obligé de revenir aux Dieux pour les prier de finir sa misère. Sed si singula huc spectantia persequerer, extra oleas omnino expatiarer; quamobrem intra meum me recipio gyrum, caussam quandam indigentiae publicæ in non notabili pecuniarum defectu indagaturus; quocirca non negamus plura heic concurrere posse momenta, sed quæ singula eruere, perinde fere est ac latentia Nili ostia indagare. Experiemur igitur quid in proposito stadio valent juveniles vires, nec quisquam, ut speramus, mirabitur, si in publica inopia, nos etiam argumentorum inopia aliquando laboremus.

(a) Ovidius Libr. 2. Amor. Eleg. 2. v. 43. de Tantalo canit: *Quærit aquas in aquis & poma fugacia captat -- Tantalus &c.* (b) L' Esprit des Loix Libr. XXI. & Cap. XXII. ubi multa in hanc rem egregie disseruntur.

§. I.

Per pecuniam intelligo materiam illam, quæ publica & perpetua æstimatione tam civium, quam aliarum gentium, cum quibus commercia illis intercedunt, difficultatibus permutationum æqualitate quantitatis subvenit (a). Dum hac ratione pecuniam consideramus, ipsa pro mensura satis universaliter haberi potest, ad quam res omnes in commercium venientes exigi solent. Quamobrem etiam ARISTOTELES (b) Numum definit: *κονὸν μέτρον τεσσάρων διαίρετης καὶ ὡραῖον*, id est communem mensuram, ad quam omnia referuntur, & quo ipsa mensurantur. Ut autem dicta mensura sit perpetua, requiritur, ut materia numerorum internum quoddam pre-

preium habeat, quo adfectum aliorum sibi divincire queat; quare rejectis vilioribus metallis, præstantiora solummodo ut æs, argentum atque aurum retinemus. Præter numeros autem dicto modo confectos introducta etiam recentiori præfertim ævo sunt eorumdem symbola, quæ si ejus fuerint indolis, ut eadem exprimere avaræ manus nec possint nec audeant, si etiam cum numis ex metallis confectis publica auctoritate pari passu ambulent, nec non in hos commutari possint; nullum est dubium, quin ad florem commerciorum & facilem pecuniarum circulationem valde conferant. Patet etiam ex dictis, quod in quavis bene constituta ac florente república tanta erit pecuniarum copia, ut singuli cives, debito accedente studio atque industria, partem earum sibi acquirere possint. Quod si vero pecuniæ inter homines inferioris sortis rarius adpareant, nec labore quantumvis improbo ex ditiorum crumenis easdem emungere queant; ob harum defectum negotia plurima, quæ tranquillitatem & felicitatem civitatis concernunt, minus opportune exsequentur, adeoque indicium erit rempublicam *Inopia* eademque satis gravilaborare, licet nonnulli dentur Harpagi, qui divitiis suis incumbant. Ab hoc autem statu distingvendus est alias, qui speciem quidem hujus mentitur, re tamen ipsa ad opulentiam civium promovendam tendit. Pone enim, quod civitas ab extra gente mutuetur pecuniæ quandam summam, pro qua modicam pendit usuram, qua vero partim institutis artibus manuariis partim promotis commerciis atque excultis metallifodinis ingentem quæstum quotannis facit, adeo ut hic decuplus fere sit reddendi fœnoris; evidens est, quod civitas per hanc mutationem emergere atque insignes opes brevi tempore sibi comparare queat. Unicam adhuc addo definitionem, calculo mox instituendo inferituram. *Unitatem* igitur *Physicam* adpello ea,

quæ uni homini sunt adprime necessaria ad vitam sustentandam, adeo ut si quis unitatem eandem vel minuat vel tollat, homo aut misere vivat aut prorsus intereat. Hinc qui duas unitates Physicas possidet, commodam vitam degere dicitur; eruntque commoditates in ratione unitatum physicarum quas quis possidet.

§. II.

Sicut homo suæ conservationis atque felicitatis natura est studiosissimus; ita etjam ut incommoda, quibus status Naturalis premitur, gravissima eluctaretur, statim ab initio mundi aliquot primum familiae tranquillitatis ac commoditatis promovendæ caufa in societas convenerunt, quæ deinceps in maiores excreverunt civitates. Ponamus jam duos viros in matrimonium ducere uxores, atque hoc facto in regione quadam confidere, habemus adeo primum societatis quasi stamen. Habeant etjam conjuges modo nominati A & B, æquales terrarum partes, nec non æquales facultates. Elapsis duobus annis ponamus familiam A auctam esse duobus liberis, familiam B autem unico tantum infante; evidens est, quod familia A unam Physicam unitatem amplius in sui sustentationem adhibere debeat, quam familia B, & consequenter hæc ipsa tanto ditior est censenda. Unde patet, quod crescente continuo numero hominum in familia quadam vel societate, media quoque, quæ ad vitam sustentandam requiruntur, perpetuo dividantur ac subdividantur, ac proinde commoditates, si quæ ante fuerint, quotidie decrescant. Adeoque apparent, quod commoditates sint in ratione reciproca personarum, quæ familiam vel civitatem constituunt; posito, quod industria civium utrobique nulla reperiatur, & quod legibus civilibus impedianter cives, quo minus alter alterius bona sibi in solidum vindicare queat.

Scho-

SCHOLION. Dum civitatem supponimus, in qua industriae nullus est locus, non solis indulgemus fictionibus. Notum enim est ex Historia antiqua, quod Lacedaemonie interdicta fuerint commercia externa, nec non exercitia artium quarumvis manuariarum, & ex recentiori, quod commercia Rossorum ante Imperatorem PETRUM I. cum exteris fuerint rara. Notum etiam est, quod apud quasdam gentes olim commercia interna fuerint ignota, ut Athenis ante Theseum, & Romæ circa reipublicæ primordia. Immo reperimus etiamnum varias nationes in Asia, in Africa, nec non in America, quæ vastas incolunt terras, suaque simplicitate ita se involvunt, ut & commercia & industriam negligant. Enimvero haud opus est, ut ab omni industria abstrahamus, quippe quæ parum valet, si vel commercia idem semper præbeant lucrum, & adhuc minus, si hæc annua patientur decrementa. Imprimis vero constat veritas allatæ propositionis, si applicatio fiat ad civitatem, quæ ci-vium numero laborat. Sic notum est, quod in Imperio Chinensi, ne media vitam sustentandi admodum diminuantur, multi parentes, naturali in liberos amori renunciantes, ipsos exponere cogantur. Immo propter eandem malefanam rationem in Insula Formosa haud licitum est feminis, ante annum ætatis XXXIV vel XXXV fœtus edere. Nibilo tamen minus cives tam memoratae insulæ quam imperii Chinensis vasta & lucrosa exercent commercia; eo enim usque increscere potest numerus incolarum, ut industria eorum, quantumvis maxima, haud sufficiat singulis sustentandis. In ejusmodi civitatibus cælibatus pro perfectione quadam haberi potest; quare etiam in imperio Chinensi reperiuntur sex millions Monachorum & longe adhuc major numerus Eunuchorum.

§. III.

Ponamus insuper, familiam A duplo numerosiorem familia B, aliquot saeculorum intervallo adeo increvisse, ut civitatem constitutat decem millionum civium, dum civitas, quae familiae B suam debet originem, non nisi quinque millions continet. Ut vero genus humanum multis est obnoxium vicissitudinibus atque calamitatibus; ita ponamus, quod vel per Bellonæ fures vel per luem quandam epidemicam in civitate posteriore, quae paucioribus gaudet incolis, ita diminuatur eorundem numerus, ut non amplius, quam quinque millia hominum in civitate modo memorata numerari queant; evidens est, quod post ingentem istam stragem cuilibet colono tot portiones cedant, quot mille ante possidebant, & quod cuilibet civium in hac republica, re ipsa possideat bis mille plures unitates physicas, quam qui incolunt priorem civitatem, quae familiae A sua & initia & incrementa debet. Interjecto tempore ingruat caritas annonæ, quae utramque civitatem pariter adfligat, hujus rigorem cives reipublicæ B vix sentient, at cives in imperio A, quorum singuli, dum ubertate frugum gaudebant, vix tamen unitatem physicam possidebant, ad tantas jam redigentur incitas, ut alimenta necessaria a populis in civitate B sibi comparare cogantur. Sed quoniam illi propter nimiam paupertatem vix fidem de solvendo invenient; postulantibus civibus in imperio B, agros suos his loco pignoris dare coguntur, atque hac ratione societas B societatem A in servitutem redigere potest.

SCHOLION. Quamvis ea ipsa, quae in medium nunc attulimus, abstractæ notiones minusque obviæ primo aspectu videantur, diversarum tamen rerum publicarum diver-

diversa admodum instituta considerantes, invenimus in ipsa experientia argumentorum nostrorum fulcrum, quod exemplis quibusdam constabit. Sic in gravissima pugna inter tribum Benjamin atque reliquum populum Israelicum tamdiu utrinque fuit pugnatum, donec ex tribu Benjamin 600 tantum viri superessent, vide *Judic.* XX: 47. Quum itaque Legibus Divinis esset statutum, ne miscerentur tribus, sed ita manerent, Num XXXIV: 9. Ergo qui e præliis servatus erat manipulus hominum, sibi nunc vindicarunt eas totas portiones, quas fratres mortui tenuerant, & proinde tanto facti sunt ditiores. Constat etiam, quod ex tenore Legum Lycurgicarum singuli Spartani æquales facultatum, quæ tamen vix modicæ fuerunt, partes posse derint. Quamobrem quo plura civium millia bellorum vis consumserat, eo majori rerum copia abundarunt ceteri, qui vel domi remanserant, vel quibus in præliis pepercerat fortuna: contra ea vero alma pace paullo diutius vigente, inter extrema quævis vivere cogebantur, ob increcentem quotannis populorum numerum. Quare etiam, quum ceteræ gentes bellorum calamitates & molestias perægre devorarent, Lacedæmonii in castris atque inter armorum strepitus plus otii atque commoditatis, quam intra privatos lares reperiebant. Posterioris sententiæ illustre admodum exemplum habemus in Patriarcha JOSEPHO, qui hac ratione totam Ægypti terram Regibus Ægyptiacis reddidit tributariam. Talis etiam rerum penuria fuit causa, quare servitutes in Poloniam passim atque in nonnullas Germaniæ regiones fuerint introductæ.

§. IV.

Interea igitur dum cives societatis B commodam &
B ad.

adfluentem degunt vitam, ceteri quos in societatem A fors detrusit, fame atque inedia ferme deficiunt, quamvis æquales ab initio portiones facultatum singuli obtinuerint. Facile autem quisque animadvertis, quosvis cives societatis B non æque divites esse; præsertim si ponamus, ut omnino par est, cives esse industrios, sed inter ditissimos societatis B atque pauperrimos societatis A perplurimas dari classes C, D, E, F, G, &c. intermedias; adeo ut in classe C ponantur omnes, qui duas unitates physicas possident, in classe D, qui tribus gaudent, & ita porro. Ex quibus consequitur, quod media, quibus homines in nominatis classibus commodam degere queant vitam, seu ipsorum commoditates sint in progressione Arithmetica, cuius primus terminus atque differentia terminorum est unitas. Data est quoque summa hujus progressionis = 2000, æqualis scilicet portionibus, quas quilibet civis in societate B possidet. Ut igitur inveniamus rationem quæ est inter media, quibus civis ditissimus ad sui commoditatæ utitur, & illa, quæ pauperrimus ad vitam sustentandam anquirit, quæque unitate physica absolvuntur, numerus 2000 in progressionem Arithmeticam est redigendus, cuius primus terminus & differentia terminorum = 1. Etenim ditissimi cujuslibet media vitam sustentandi sunt ad media pauperrimi uti numerus terminorum hoc est, uti multitudine commoditatum est ad unitatem. Ut igitur formulam generalem proportioni modo memoratae eruendæ inservientem exhibeamus, sit primus terminus = a , differentia terminorum = d , summa progressionis = e , numerus terminorum = x , per principia Algebraica in-

$$\text{veniemus } x = \frac{-a - \sqrt{d}}{d} + \sqrt{\frac{aa - ad + dd}{4} + \frac{2cd}{d}}$$

sed

sed per hypothesin est $a = d$; adeoque $x = \sqrt{\frac{\frac{1}{4}aa + 2ac - \frac{1}{4}a}{a}}$
& ulterius $a = 1$, & $c = 2000$; ergo $x = \sqrt{\frac{2c + \frac{1}{4}}{4000 + \frac{1}{4} - \frac{1}{2}}} = \sqrt{4000,25} - \frac{1}{2} = 63,25 - \frac{1}{2} = 62,75$ seu $x = 63$, quam proxime.
Ex calculo jam allato corollaria nonnulla in nostrum usum deducere juvat.

COROLLARIUM I. Quoniam progressio Arithmetica, quam invenimus, & quæ exprimit rationem inter media vitam sustentandi, quibus homines diversarum classium gaudent, est eadem cum serie numerorum naturalium 1, 2, 3, 4, 5, 6, 7, 8, 9, 10, - - - 63; & insuper quilibet terminus incipiendo a primo exprimit gradum industriae; evidens est, quod secundus terminus indicet unum solummodo industriae gradum & ita porro. Qui igitur in primo gradu sunt constituti, vix tantum quotidiano lucrantur opere, quantum requiritur ad vitam sustentandam. Qui in secundo est gradu, uxorem ducere potest; miseram autem hi conjuges degunt vitam, si liberos procreant; vel etiam si his necessaria præstare queant, revera in tertio gradu sunt collocandi.

COROLL. II. Ditissimi autem, seu qui in suprema classe sunt constituti, possunt gradu, quo pollut, seu industriae seu fortunæ, sexaginta tres unitates physicas sibi comparare interea, dum infimæ classis homines unam tantummodo sibi acquirunt. Quamobrem nisi præjudicia calculum interverterent, sequeretur, quod ditissimum familiæ forent numerosissimæ & propagines admodum succulentæ; cuius tamen contrarium quotidiana ferme experientia evincit. Hoc autem inde potissimum

provenit, quod in illo commoditatis gradu valde ingra-
vescat luxus, qui vires tam corporis quam animæ ener-
vat, tum etiam quod hi plerumque, vix ephebi facti, ni-
hil non suis permittant cupiditatibus & vincula conjuga-
lia ægre ferant. Quamobrem ex Historia constat, quod
gravissima oratione, quam Imperator Octavius AUGU-
STUS habuit ad Equites Romanos, qui abrogationem le-
gis Juliæ admodum desiderabant, non tam populus quam
potius Optimates fuerint offensi; quibus scilicet perfa-
dere voluit, ut per legitima matrimonia defectum civi-
um, quos bellorum civilium rabies absumperat, sensim
supplere conarentur.

COROLL. III. Præterea si ad augendas circa calcu-
lum observationes ipsam experientiam in subsidium ad-
hibeamus, deprehendimus, quod singulis hominibus **ex**
æquo non faveat fortuna, sed quod longe plures in qualibet
societate sint, qui inopia premuntur, quam qui divitiis
circumfluunt, adeoque numerus hominum quamlibet
classem in allata serie constituentium sit inverse uti me-
dia, quibus ibidem gaudent homines ad vitam susten-
tandam, seu numerus hominum in prima classe erit ad
numerum eorundem in suprema, sicut $\frac{1}{4} : \frac{1}{63} : : 63 : 1$.
circiter. Unde patet, quod in allata hypothesi ad uni-
us divitis commoditatem 63 personæ, quæque suo mo-
do, concurrant, immo nonnunquam adhuc plures. Ini-
to enim calculo deprehendit Galliæ Mareschallius DE
VAUBAN, quod suo tempore in isthoc regno essent
19094146 personæ, & quod ex his tantummodo decem
mille familiæ sufficiente commoditate fruerentur, uti
constat ex libro *Dixme Royale Part. II. p. 180.* Ponam-
mus igitur decem personas in qualibet harum ditorum
familiarum esse, sequitur, quod 190 circiter aliæ operas su-
as conferant ad cuiuslibet harum commoditatem pro-
mover-

movendam. Quod si numerus aliis inservientium jam allatus nimis forte magnus cuiquam videatur, in memoriam sibi revocet, quod unus civis Romanus in servitio suo habuerit viginti millia mancipiorum, & proinde quod mille tales cives servitio suo distinere potuerint viginti millions hominum. Quid? Quod CRASSUS jactare consvererit, quod nemo dives censeri posset, nisi qui integrum sustentare potuerit exercitum.

SCHOLION. Sicut mutabile admodum est hominum ingenium, ita opiniones quoque admodum mutantur, adeo ut non immerito statuerit BARCLAJUS, quod cui libet saeculo suis sit genius. Nonnunquam enim gloria civitatis est ille scopus, ad quem omnes, qui ingenui haberi volunt cives, viribus atque consiliis contendunt. Et hanc etatem juvenile reipublicæ robur merito censemus. Huic succedit gravis senectus, dum cives annis non graves, opes solummodo colligere nituntur, atque in hoc statu adeo omnia timent, ut nemini portionem quandam opum, interposita licet & fide & pignore, mutuare audeant. Ingravescit itaque avaritia, familiare senectutis vitium, sed sub specioso Oeconomia vel parsimoniae titulo. Cumulantur igitur opes, eisdemque homines, tamquam lyncei vultures, incumbunt, omnes a cupaturi occasiones, quibus bona aliorum civium, quos in miseram conditionem fors detrusit, sibi subjiciant. Videamus igitur, quæ portenta Politica isthac moralis causa producat.


COROLL. IV. His præmissis, ponamus quod quis eorum, qui in superioribus sunt classibus, in futuros usus seponat quodam die unam physicam unitatem; erit omnino unus civium, qui hoc die necessarium viatum desiderat. Et si pergit alter pari studere parsimoniae,

nus civium propter imperiosam necessitatem, ex avaritia divitis ortam, patriam suam tandem deserere cogetur. Ex quibus apparet, quod tenacitas opulentiorum, præsertim ubi ea virtutis Politicæ loco habetur, nec non impeditus pecuniarum circulus non minus noceant civibus, quam gravis annonæ caritas vel contagiosus morbus. Immo caussa illa moralis indigentia publicæ tanto gravior est habenda, quam Physica, quod indigentia ista sit veluti Tantalica sitis, quæ oritur non ex defectu pecuniarum, sed ex suppresso earundem usu, non ex infortuniis, sed ex malitia hominum. Enimvero ut atrocitas hujus mali tanto magis appareat, ponamus, quod in allata progressionis serie incipiendo a termino 41, singuli, qui in hac classe versantur, unam continuo unitatem in consuetis suis minuant impensis, duas autem seponant qui sunt in classe 42 & ita porro; evidens est, quod nova emergat progressio Arithmetica numerorum imparium 1. 3. 5. 7. 9. 11. &c. - - - 23. cuius seriei summa 138 indicat, quod ex 2000 civibus non pauciores 138 quotannis ob tenacitatem opulentiorum Patriam relinquent, quamvis nulla ingravescant mala physica. Quæ quidem calamitas eo major est censenda, si simul inolescat opinio, quod artes manuariæ sint tantummodo voluptatis atque luxus instrumenta; & proinde exiguum his pretium statuendum, qua præjudicata opinione omnis sufflaminatur industria. Ponamus jam civitatem, in qua tres milliones hominum reperiuntur; facili calculo ostendi potest, quod per intempestivam parsimoniam & suppressum pecuniarum circulum nec non ob fidei publicæ incertitudinem ultra 200000 cives etiam industriæ dulces brevi relinquent penates, præsertim si agrorum portiones numero civium nequaquam respondeant.

COROLL. V. Hinc etjam apparet, quantum monopolia,

polia, præsertim illa, quæ concernunt res necessarias, quorsum imprimis referimus frumenta & alia vitam sustentandi adminicula, nec non pecunias, noceant civitati, & quam exitiosa in his casibus sit fœnectorum licentia. Si enim hi mercatores non tantum lucentur, quantum velint, necessarias merces indigentibus non vendunt, adeoque cives suos opibus privare præter fas & æquum non dubitant. Hoc modo Josephus Pharaoni comparavit omnium Ægyptiorum opes, & pari ratione potest vel familia vel societas ceteros opprimere cives, si nullis impediatur legibus civilibus, quæ minus ex aliorum infortuniis atque dispendio opum suarum querat compendia. Nam si aliquot quotidie minuat unitates physicas in impensis consuetis, ceteri, qui labore & sudore quotidianum sibi comparant victum, ad incitas redigentur. Pari modo Clerus Gallicus, qui opibus circumfluebat, sibi emit omnium eorum patrimonia, qui expeditiones sacras in Palæstinam olim suscepereunt. Immo si facer hic furor in Orientem durasset aliquanto diutius, probabile est, quod callidi Monachi patrimonio Petri bona plerorumque Europæ incolarum brevi addidissent: Siquidem soli fere fuerunt dispensatores rerum ad vitam sustentandam necessariarum. • Enimvero his meditationibus diutius immorari, instituti nostri ratio non permittit, quare eisdem nunc imponimus

FINE M.



THESES MISCELLANÆ.

Thef. I. Omnis Philosophia est & theoretica & practica.

Thef. II. Sicut merito negamus principium contradictionis esse primum, ita etiam contendimus dare a liquid sine ratione sufficiente.

Thef. III.

Thef. III. Quæstio de mundo optimo non tanti est momenti, quanta fuit opera, quam ei impenderunt Erudit.

Thef. IV. Lubenter adoptamus canonem hunc: Intellectus non ponit, sed supponit.

Thef. V. Sic etiam canonem huncce veteribus probatum rectum judicamus: Nullus sapiens punit, quia peccatum est, sed ne peccet.

Thef. VI. Divisio illa officiorum erga Deum, erga semetipsum, & erga alios, proprie loquendo claudicat.

Thef. VII. Falsam omnino opinionem fovent illi, qui statuunt obligationem esse originem juris.

Thef. VIII. Disceptatio Philosophorum de moralitate objectiva & subjectiva abit in meram logomachiam.

Thef. IX. Quæstio, an detur actio indifferens? pro problematica merito censeri potest.

Thef. X. Genuinum commercii inter animam & corpus modum, nondum esse detectum existimamus.

Thef. XI. Immortalitas animæ optime a Scriptura Sacra demonstratur.

Thef. XII. Datur quantum, quod augeri non potest.

Thef. XIII. Quod Deus sit, scimus; sed quid sit, scire nequimus.

Thef. XIV. Quamvis Logica nostro ævo a tricis Scholasticorum admodum sit repurgata, minime tamen dubitamus, quin multa adhuc a residuo Scholasticorum fermento sine ullo scientiæ detrimento abjici queant.

Thef. XV. Fallunt omnino, qui Historiam Philosophiæ instrumentalis circa comprehendunt: quum eodem jure Arithmetica & Geometria ad hanc referri possent.

Thef. XVI. Licet peritia Lingvarum orientalium magnum usum præstet in intelligenda Scriptura Sacra: usus tamen ejus nullus est censendus, nisi conjuncta hæc peritia est cum debita cognitione Philosophica.

